

曼殊詩歌目次

耶婆提病中末公見示新作伏枕奉答	
兼呈曠號士	三
爲玉鸞女弟繪扇	三
飲席贈歌者	三
簡法忍	三
南樓寺懷法忍葉葉	三
何處	三
住西湖白雲禪院作此	三
東行別仲兄	三
過若松町有感	三
過若松町有感示仲兄	三

題畫	三
芳草	三
失題	三
代柯子簡少侯	三
以詩并畫留別湯國頓二首	三
汽車中	三
憩平原別邸贈玄玄	三
東裝歸省	三
過平戶延平誕生處	三
過莆田	三
西湖韜光菴夜聞鶻聲簡劉三	三

寄晦聞·····	三
浣江道中口占·····	三
失題·····	三
題師梨集·····	三
題拜倫集·····	三
有懷二首·····	三
爲調箏人繪像二首·····	三
調箏人將行屬續金粉江山圖題贈二 絕·····	三
寄調箏人三首·····	三
無題八首·····	三
本事十首·····	三
吳門依易生韻十一首·····	三

東居雜詩十九首·····	三
譯詩	

冬日·····	四
去燕四首·····	四
頌頤赤牆靡四首·····	四
樂苑四首·····	四
星耶峯耶俱無生·····	四
贊大海·····	四
答美人贈束髮櫛帶詩·····	四
去國行·····	四
哀希臘·····	四

耶婆提病中末公見示新作伏枕奉答兼呈曠處士

君爲塞上鴻，我是華亭鶴。遙念曠處士，對花弄春爵。良訊東海來，中有游仙作。勸我加餐飯，規我近綽約。炎蒸困羈旅，南海何遼索。上國亦已蕪，黃星向西落。青驪逝千里，瞻鳥止誰屋。江南春已晚，淑景付冥莫。建業在何許？胡塵紛漠漠。佳人不可期，皎月照羅幕。九關日以遠，肝膽竟誰託？願得趨無生，長作投荒客。竦身上須彌，四顧無崖嶠。我馬已玄黃，梵土仍寥廓。恆河去不息，悲風振林薄。袖中有短書，思寄青飛雀。遠行戀儔侶，此志常落拓。

爲玉鸞女弟繪扇

日暮有佳人，獨立瀟湘浦。疎柳盡含煙，似憐亡國苦。

飲席贈歌者

一曲凌波去，紅蓮理白蓮。江南誰得似，猶憶李龜年。

簡法忍

來醉金盞露，胭脂畫牡丹。落花深一尺，不用帶蒲團。

南樓寺懷法忍葉葉

萬物逢搖落，姮娥耐九秋。綺衣人不見，獨上寺南樓。

何處

何處停儂油壁車，西泠終古卽天涯。搗蓮煮麝春情斷，轉綠迴黃妄意除。玳瑁窗虛延冷月，芭蕉葉捲抱秋花。傷心怕向妝台照，瘦盡朱顏祇自嗟！

住西湖白雲禪院作此

白雲深處擁雷峯，幾樹寒梅帶雪紅。齋罷垂垂潭入定，菴前潭影落疏鐘。

東行別仲兄

江城如畫一傾杯，乍合仍離倍可哀。此去孤舟明月夜，排雲誰與望樓台！

過若松町有感

孤燈引夢記朦朧，風雨鄰菴夜半鐘。我再來時人已去，涉江誰爲采芙蓉！
過若松町有感示仲兄

契闊死生君莫問，行雲流水一孤僧。無端狂笑無端哭，縱有歡腸已似冰！
題畫

海天空闊九皋深，飛下松陰聽鼓琴。明日飄然又何處，白雲與爾共無心。

芳草

芳草天涯人是夢，碧桃花下月如煙。可憐羅帶秋光薄，珍重蕭郎解玉鈿。

失題

斜插蓮蓬美且鬋，曾教粉指印青編。此後不知魂與夢，涉江同泛采蓮船。

代柯子簡少侯

小樓春盡雨絲絲，孤負添香對語時。寶鏡有塵難見面，妝臺紅粉畫誰眉？

以詩並畫留別湯國頓

蹈海魯連不帝秦，茫茫煙水著浮身。國民孤憤英雄淚，灑上鮫綃贈故人。
海天龍戰血玄黃，披髮長歌覽大荒。易水蕭蕭人去也，一天明月白如霜。

^辦汽車中隔座女郎言其妹氏懷仁仗義年僅十三乘摩多車冒風而歿余憐而慰之并示湘痕阿可

人間花草太匆匆，春未殘時花已空。自是神仙淪小謫，不須惆悵憶芳容。

憩平原別邸贈玄玄

狂歌走馬遍天涯，斗酒黃雞處士家。逢君別有傷心在，且看寒梅未落花！

束裝歸省道出泗上會故友張君雲雷亦歸漢土感成此絕

范滂有母終須養，張儉飄零豈是歸。萬里征途愁入夢，天南分手淚沾衣！

過平戶延平誕生處

行人遙指鄭公石，沙白松青夕照邊。極目神州餘子盡，袈裟和淚伏碑前。

過莆田

柳陰深處馬蹄驕，無際銀沙逐退潮。茅店冰旗知近市，滿山紅葉女郎樵。

西湖韜光菴夜聞鵲聲簡劉三

劉三舊是多情種，浪迹煙波又一年。近日詩腸饒幾許，何妨伴我聽呢鵲！

寄晦聞

忽聞鄰女豔陽歌，南國詩人近若何？欲寄數行相問訊，落花如雨亂愁多！

淀江道中口占

孤村隱隱起微煙，處處秧歌競插田。羸馬未須愁遠道，桃花紅欲上吟鞭。

失題

落日淙波遠島濱，悲笳一動獨傷神。誰知北海吞蜃日，不愛英雄愛美人。

題師梨集

誰贈師梨一曲歌，可憐心事正蹉跎。琅玕欲報何從報，夢裏依稀認眼波。

題拜倫集

西班牙雪鴻女詩人，過存病榻，親持玉照一幅，拜倫讀集一卷，曼陀羅花共含羞草一束見贈，且殷殷勸以歸計。嗟夫，予早歲披瀝，學道無成，思維身世，有難言之痛，爰疾病書二十八字於拜倫卷首，此意雪鴻大家能知之耳！

秋風海上已黃昏，獨向遺編弔拜倫。詞客飄蓬君與我，可能異域爲招魂！

有懷

玉砌孤行夜有聲，美人淚眼尙分明。莫愁此夕情何限，指點荒煙鎖石城。
生天成佛我何能，幽夢無憑恨不勝。多謝劉三問消息，尙留微命作詩僧。

爲調箏人繪像

收拾禪心侍鏡台，沾泥殘絮有沉哀。湘弦酒遍胭脂淚，香火重生劫後灰！

（嘗作風絮美人圖，寄晦公廣州，晦公寄余詩有「向人風絮有沉哀」句。）

淡掃蛾眉朝畫師，同心華髻結青絲。一杯顏色和雙淚，寫就梨花付與誰？

（漢元帝時，有同心髻，頂髮相纏，束以絳繩，今日本尚有此風。）

調箏人將行屬續金粉江山圖題贈二絕

乍聽鸚鵡歌似有情，危弦遠道客魂驚。何心描畫閒金粉，枯木寒山滿故城！
送卿歸去海潮生，點染生綃好送行。五里徘徊仍遠別，未應辛苦爲調箏。

寄調箏人

禪心一任蛾眉妬，佛說原來怨是親。雨笠煙簑歸去也，與人無愛亦無嗔！
生憎花發柳含煙，東海飄零二十年。懺盡禪情空色相，琵琶湖畔枕經眠！
偷嘗天女脣中露，幾度臨風拭淚痕。日日思君令人老，孤窗無那正黃昏！

無題

綠窗新柳玉台傍，臂上微聞菽乳香。畢竟美人知愛國，自將銀管學南唐。
輕紅籬動月輪西，冰作欄杆玉作梯。寄語麻姑要珍重，鳳樓迢遞燕應迷。
水晶簾捲一燈昏，寂對河山叩國魂。祇是銀鴛羞不語，恐防重惹舊啼痕。
空言少據定難猜，欲把明珠寄上才。聞道別來餐事減，晚裝猶待小鬟催。
綺陌春寒壓馬嘶，落紅狼籍印苔泥。莊辭珍貺無由報，此別愁眉又復低。
棠梨無限憶鞦韆，楊柳腰肢最可憐。縱使有情還有淚，漫從人海說人天。
羅幙春殘欲暮天，四山風雨纔纔綿。分明化石心難定，多謝雲娘十幅箋。
星裁環珮月裁璫，一夜秋寒掩洞房。莫道橫塘風露冷，殘荷猶自蓋鴛鴦。

本事

春雨樓頭尺八簫，何時歸看浙江潮？芒鞋破鉢無人識，踏過櫻花第幾橋。
丹頓拜倫是我師，才如江海命如絲。朱弦休爲佳人絕，孤憤酸情欲語誰。
桃顚檀口坐吹箏，春水難量舊恨盈。華嚴瀑布高千尺，未及卿卿愛我情！

烏舍凌波肌似雪，親提紅葉索題詩。遠卿一鉢無情淚，恨不相逢未繫時。
丈室番茶手自煎，語深香冷涕潸然。生身阿母無情甚，爲向摩耶問夙緣。
相憐病骨輕於蝶，夢入羅浮萬里雲。贈爾多情詩一卷，他年重檢石榴裙。

（贈以梵本沙恭達羅）

慵妝高閣鳴箏坐，羞爲他人工笑顰。鎮日歡場忙不了，萬家歌舞一閒身。
無量春秋無量恨，一時都向指間鳴。我亦艱難多病日，那堪更聽八雲箏。
碧玉莫愁身世賤，同鄉仙子獨銷魂。袈裟點點疑櫻瓣，半是胭脂半淚痕。
九年面壁成空相，持錫歸來悔晤卿。我本負人今已矣，任他人作樂中爭。

吳門依易生韻

江南花草盡愁恨，惹得吳娃笑語頻。獨有傷心驢背客，暮煙疎雨過闌門。
碧海雲峯百萬重，中原何處託孤蹤。春泥細雨吳越地，又聽寒山夜半鐘。
月華如水浸瑤瑤，環珮聲聲擾夢懷。記得吳王宮裏事，春風一夜百花開。

姑蘇台畔夕陽斜，寶馬金鞍翡翠車。一自美人和淚去，河山終古是天涯。
萬戶千門盡劫灰，吳姬含笑踏青來。今日已無天下色，莫牽麋鹿上蘇臺。
水驛山城盡可哀，夢中衰草鳳凰台。春色總無歌舞地，萬花撩亂爲誰開。
年華風柳共飄飄，酒醒天涯問六朝。猛憶玉人明月下，悄無人處學吹簫。
萬樹垂楊任好風，斑驪西向水田東。莫道碧桃花獨豔，灤山湖外夕陽紅。
平原落日馬蕭蕭，賸有山僧賦大招。最是令人淒絕處，垂虹亭畔柳波橋。
碧城烟樹小彤樓，楊柳東風繫客舟。故國已隨春日盡，鷗鴉聲急使人愁。
白水青山未盡思，人間天上兩霏微。輕風細雨紅泥寺，不見僧歸見燕歸。

東居雜詩十九首

卻下珠簾放故羞，浪持銀燭照梳頭。玉階人盡情難訴，悄向星河覓女牛。
流螢明滅夜悠悠，素女嬋娟不耐秋。相逢莫問人間事，故國傷心祇淚流。
羅襪換罷下西樓，荳蔻香溫語未休。說到年華更羞怯，水晶簾下學篴篴。

翡翠流蘇白玉鉤，夜涼如水待牽牛。知否去年人去後，枕函紅淚至今留。
異國名香莫浪偷，窺簾一笑意偏幽。明珠欲贈還惆悵，來歲雙星怕引愁。
碧闌干外夜沉沉，斜倚雲屏燭影深。看取紅酥渾欲滴，鳳文雙結是同心。
秋千院落月如鉤，爲愛花陰嬾上樓。露溼紅渠波底襪，自拈羅帶淡蛾羞。
拆得黃花贈阿嬌，暗抬星眼謝王喬。輕車肥轡金鈴響，深院何人弄碧簫。
碧沼紅蓮水自流，涉江同上木蘭舟。可憐十五盈盈女，不信盧家有莫愁。
鐙飄珠箔玉箏秋，幾曲回關水上樓。猛憶定菴哀怨句，三生花草夢蘇州。
人間天上結離憂，翠袖凝妝獨倚樓。淒絕蜀楊絲萬縷，替人惜別亦生愁。
六幅瀟湘曳畫裙，鐙前闌麝自氤氳。扁舟容與知無計，兵火頭陀淚滿樽。
銀燭金杯映綠紗，空持傾國對流霞。酖顏欲語嬌無力，雲髻新簪白玉花。
蟬翼輕紗束細腰，遠山眉黛不能描。誰知詞客蓬山裏，煙雨樓台夢六朝。
胭脂湖畔紫騮驕，流水棲鴉認小橋。爲向芭蕉問消息，朝朝紅淚欲成潮。
珍重嫦娥白玉姿，人天攜手兩無期。遺珠有恨終歸海，睹物思情更可悲。

誰憐一闋斷腸詞，搖落秋懷祇自知。況是異鄉兼日暮，疏鐘紅葉墜相思。
楓櫺秋林細雨時，天涯飄泊欲何之？空山流水無人迹，何處蛾眉有怨詞！
關雎芬芳總負伊，并肩攜手納涼時。舊廂風月重相憶，十指纖纖擊荔枝。

譯詩

冬日（師樂詩）

孤鳥棲寒枝，悲鳴爲其曹。河水初結冰，冷風何蕭蕭。荒林無宿葉，瘠土無卉苗。萬籟盡寥寂，唯聞喧擊皐。

去燕（蘇易持詩）

燕子歸何處？無人與別離。女行變誰見？誰爲感差池？
女行未分明，蹀躞復何爲？春聲無與和，尼南欲語誰！
遊魂亦如是，蛻形共驅馳。將歸復將翔，隨女天之涯。

翻飛何所至，塵寰總未知。女行諒自適，獨我棄如遺。

頽頽赤牆靡（彭斯詩）

頽頽赤牆靡，首夏初發苞。惻惻清商曲，吟音何遠姚。
予美諒天紹，幽情申自持。蒼海會流枯，相愛無絕期。
蒼海會流枯，頑石爛炎熹。微命屬如縷，相愛無絕期。
慘袪別予美，離隔在須臾。阿陽早日歸，萬里莫踟躕。

樂苑（阿露吟詩）

萬卉匝唐園，深黝乃如海。嘉實何青青，按部分班采。
鬱鬱曼皋林，井閭竦蒼柱。木縣揚朱脣，臨池歌嘯喻。
明月穿疎篁，眉黛無比倫。分光照菡萏，幻作一甌銀。
佳人勸醇醪，令我精魂奪。佇胎復佇胎，樂都長層屑。

（楚士女詩人陀羅沙，爲其宗國告哀，成此一首。詞旨華深，正言若反。嗟乎此才，不幸短命。譯爲五言，以示諸友且贈其

妹氏於藍巴干。藍巴干者，其家族之圖也。曼殊。

星耶峯耶俱無生（拜翰詩）

星耶峯耶俱無生，浪撼沙灘岩滴淚，圍範茫茫甯有情，我將化泥溟海出。

贊大海（拜翰詩）

皇濤瀾汗，靈海黝冥。萬艘鼓楫，泛若輕萍。茫茫九圍，每有遺虛。曠或天沼，匪人攸房。大器自運，振盪粵牟。豈伊人力，赫彼神工。罔象乍見，決舟沒人。狂響未幾，遂爲波臣。掩體無裨，歸骨無墳。喪鐘聲沙，逝矣誰聞。誰能乘蹻，履涉狂波。藐諸蒼生，其若公何。泱泱大風，振懦起罷。茲維公功，人力何衰。亦有雄豪，中原陵厲。自公之何，擣彼空際。驚浪哮哮，颺魂懷神。轉側張皇，冀爲公憐。騰瀾赴厓，載彼微體。捋溺含弘，公胡豈弟。搖山撼城，聲若雷霆。名王黔首，莫不震驚。赫赫軍艘，亦有虛聲。雄視海上，大莫與京。自公視之，眇矣其形。紛紛溶溶，旋入滄溟。彼阿摩陀，失其威靈。多羅縛迦，壯氣亦傾。依公而居，雄國幾許。西利伽維，希臘羅馬。偉哉自繇，公所錫予。君德既衰，耗哉斯土。遂成遺墟，公目所覩。以教以嬉，瀟回濤舞。蒼顏不駮，長壽自古。渺瀰瀰漫，滔滔不舍。

赫如陽燄，神靈是鑑。別風淮雨，上臨下監。扶搖羊角，溶溶澹澹。北極凝冰，赫道淫灑。浩此地鏡，無裔無襜。圓形在前，神光率閃。精彪變怪，出爾泥淦。回流云轉，氣易舒慘。公之淫威，忽不可驗。蒼海蒼海，余念舊恩。兒時水嬉，在公膺前。沸波激岸，隨公轉旋。淋淋翔翔，媵余往還。瀛我匈臆，留我精魂。惟余與女，父子等親。或近或遠，託我元身。今我來斯，提公之轡。

答美人贈束髮璫帶詩

（拜倫詩）

何以結綢繆，文紕持作綰。曾用繫卷髮，貴與仙蛻倫。繫著蘿衣裏，魂魄還相牽。共命到百歲，殉我歸重泉。朱脣一相就，洵液皆分香。相就不幾時，何如此意長。以此俟偕老，見當念舊時。髮情如根荄，句萌無絕期。今髮迺如飭，波文映珍鬢。頓首一何倭，舉世無與易。錦帶約鬢髮，朗若炎精燄。赤道霽無雲，光景何鮮暉。

去國行

（拜倫詩）

行行去故國，瀨遠蒼波來。鳴湍激夕風，沙鷗聲淒其。落日照遠海，游子行隨之。須臾與爾別，故

國從此辭。日出幾利鄰，明日胸息間。海天一清嘯，舊鄉長棄捐。吾家已荒涼，爐竈無餘燠。牆壁生蒿藜，犬吠空門邊。童僕爾善來，恫哭亦胡爲？豈懼怒濤怒，抑畏狂風危？涕泗勿滂沱，堅船行若飛。秋鷹甯爲疾，此去樂無涯。童僕前致辭，敷衽白丈人：風波甯足憚，我心諒苦辛。阿翁長別離，慈母平生親。煢煢誰復顧，蒼天與丈人。阿翁祝我健，殷勤尙少怨。阿母沉哀恫，嗟猶來無遠。童子勿復道，淚注盈千萬。我若效童愚，流涕當無算。火伴爾善來，爾顏胡慘白？或懼法國仇，抑被勁風赫。火伴前致辭，吾生豈驚迫，獨念閨中婦，顏容定枯瘠。賤子有妻孥，隨公居澤邊。兒啼索阿爹，阿母心熬煎。火伴勿復道，悲苦定何言。而我薄行人，狂笑去悠然。誰復信同心，對人陽太息。得新已棄舊，媚日生顏色。歡樂去莫哀，危難甯吾逼。我心絕悽愴，求淚反不得。悠悠倉浪天，舉世無與忤。世既莫吾知，吾豈歎離羣？路人飼吾犬，哀聲或猶狺。久別如歸來，翫我腰間褌。帆檣女努力，橫起幻泡簫。此行任所適，故鄉不可期。欣欣波濤起，波濤行盡時。欣欣荒野窟，故國從此辭。

哀希臘（拜倫詩）

巍巍希臘都，生長奢侈好。情文何悲鬱，茶輻思靈保。征伐和親策，陵夷不自葆。長夏尚滔滔，頽陽照空島。宰詞與誦詞，詞人之所生。壯士彈坎侯，靜女揄鳴箏。榮華不自惜，委棄如浮萍。宗國杳無聲，乃向西方鳴。山對魔羅東，海水在其下。希臘如可與，我從夢中覩。波斯京觀上，獨立向誰語。吾生豈爲奴，與此長終古。名王踞巖石，雄視沙選濱。船師列千艘，率土皆其民。晨朝大點兵，至暮無復存。一爲亡國哀，淚下何紛紛。故國不可求，荒涼問水瀕。不聞烈士歌，勇氣散如雲。琴兮國所寶，仍世以爲珍。今我胡疲茶，拱手與他人。威名盡墜地，舉族供奴畜。知爾憂國士，中心亦以惡。而我獨行謠，我猶無面目。我爲希人羞，我爲希臘哭！往者不可追，何事徒頻蹙。尙念我先人，因茲糜血肉。冥冥蒿里間，三百斯巴族。但令百餘一，堪造披麗谷。萬籟一以宗，彷彿聞喧鬼。鬼聲紛鸛鸛，幽響如流泉。生者一人起，導我赴行間。槁骨徒爲爾，生者默無言。徒勞復徒勞，我且調別曲。注滿杯中酒，我血勝酃醪。不與突厥爭，此胡本游牧。嗟爾俘虜餘，酌酒顏何惡。王迹已陵夷，尙存羽衣舞。鞞盧方陣法，知今在何許？此乃爾國故，糜散隨塵土。偉哉佐摩書，甯當詒牧圉。注滿杯中酒，勝事日以墮。阿郎有神歌，神歌今始知。曾事波利葛，力能絕天維。雄君雖云虐，與女同本支。羯島有暴君，其名彌爾痕。闔達有大度，勇敢爲世師。今茲丁末造，安得君

如斯？束民如連鎖，豈患民崩離？注滿杯中酒，倏然懷故山。峨峨蘇里巖，湯湯般家海。繫彼陀梨種，族姓何斑斑。儻念秋羅，龍胤未凋殘。莫信法郎克，人言誑爾者。鋒刃藏禍心，其王如商賈。驕似突厥軍，黯如羅甸虜。爾盾雖彭亨，擊碎如破瓦。注滿杯中酒，繼下舞婆娑。國恥棄如遺，覩妝猶娥娥。明眸復善睐，一顧光斐羅。好乳乳奴子，使我涕滂沱。立我修甯峽，旁皇雲石梯。獨有海中潮，伴我聲悲嘶。願爲摩天鵠，至死鳴且飛。碎彼望明杯，俘邑安足懷？